

四庫全書

史部

# 欽定四庫全書

史部

歷代名臣奏議卷九十三

四

詳校官檢討<sub>臣</sub>朱依吳

編修<sub>臣</sub>裴謙覆勘

總校官編修<sub>臣</sub>王燕緒

校對官修撰<sub>臣</sub>吳錫齡

謄錄監生<sub>臣</sub>范廷驊

欽定四庫全書

歷代名臣奏議卷九十三

明

楊士奇等撰

經國

宋孝宗時張浚論和戰利害疏曰臣今月二十五日恭  
被御筆處分臣已即日具奏去訖臣雖愚陋中有所懷  
敢不盡言伏惟聖慈俯賜矜察今之議者孰不以戰守  
為說其次則就遵舊轍重講前好以臣觀之戰守之說

是也然而爭城爭地罪不容誅城高池深兵甲堅利委而棄之地利不如人和則是戰守之中尚有可得而論者烏臣竊以為戰守之道本以廟勝君天下者誠能正身以正朝廷正朝廷以正百官正百官以正萬民用之戰則克守則固理有決然者矣如是而後可以言戰守仰惟陛下以神聖恭儉之資受太上委任之重即位以來孜孜治道然而德政未洽于人心宿弊未革於天下揆以廟勝猶有可疑臣愚願陛下發乾剛奮獨斷於旬

月之間大布詔旨一新內治盡循太祖太宗之治使南北之人知有大治於後人心既孚兵氣必振臣衰暮之景精力有限理當退閒以全晚節豈肯分毫更有覬念獨以事機迫切治亂安危斷在今歲臣若尚懷顧畏他日身名具喪辱國辱家悔之無及伏願陛下深軫宸慮早定至計事或二三終恐無成臣愚干冒聖聰俯伏俟罪

起居郎胡銓上疏曰右臣准樞密院劄子十一月十四

日三省樞密院同奉聖旨令於後省限一日集議當與不當議和合與不合遣使禮數之後先土疆之取與條具聞奏仍令各舉所知以備小使者臣竊惟國家自紹興初與金人講和竭民膏血而不卹忘國大讎而不報上下偷生苟安歲月以為盟好可恃蕩然決去藩維之守一旦完顏亮變生肘腋宗廟社稷幾不血食天下寒心陛下即位以來乾剛獨斷奮然圖任張浚及二三大臣力謀恢復符離之師兵不血刃而故疆復得使李顯

忠盡忠於國不貪小利以成大舉之功則中原響應勢  
若破竹恢復之期可指以俟矣雖然功雖不成事雖不  
立自京都播遷之後垂四十年未有如符離之舉也敵  
人緣此震懼知陛下有大有為之志知廟謀有出不意  
之奇知邊鄙有折衝敵愾之人知臺諫有明目張膽之  
臣知朝廷有面折廷諍之士以為中國有人遂有乞和  
之意兵法曰無故而求和者謀也敵人詭計端在於此  
昨來京都失守本於大臣耿南仲主和二聖劫遷本於

宰相何臬主和維揚失守本於宰相汪黃主和完顏亮之變本於權臣主和自汴京板蕩以來四十年間敵用銳師勁卒長驅入國何嘗不以和哉暴蔑我二聖汙踐我兩宮殘毀我宗廟陵夷我社稷發掘我陵寢皇天后土實聞此言今欲與不戴天之讎講信脩睦三綱五常掃地盡矣就令和好可成金人可信決不叛盟孝子順孫寧忍為之況萬萬無可信之理前車覆後車戒陛下若不深思遠慮力脩政事力脩守備力任將相力圖



恢復而苟目前之安臣恐後車又將覆也議者乃曰姑與之和而陰為之備外雖和而內不忘戰此向來權臣誤國之言陛下聞之熟矣嗚呼燕安酖毒不可懷也一溺於和則上下偷安將士解體終身不能自振尚又安能戰乎其為酖毒多矣可勝寒心冒犯天威臣無任戰懼之至

銓又進故事曰冒頓既立時東胡強使使謂冒頓曰欲得頭曼時號千里馬冒頓問羣臣皆曰此匈奴寶馬也

勿予冒頓曰奈何與人鄰國愛一馬乎遂與之頃之東胡以為冒頓畏之使使謂冒頓曰欲得單于一闕氏冒頓復問左右左右皆怒曰東胡無道迺求闕氏請擊之冒頓曰奈何與人鄰國愛一女子乎遂取所愛闕氏與東胡東胡王愈驕西侵與匈奴中間棄地莫居千餘里各居其邊為甌脫甌脫境上候望之處東胡使使謂冒頓曰匈奴所與我界甌脫外棄地匈奴不能至也吾欲有之冒頓問羣臣或曰此棄地予之於是冒頓大怒曰地者國之

本也奈何予人諸言與者皆斬之

臣謹案春秋以地為重凡書取地皆惡之也成二年  
取汶陽田則齊以戰敗而賂我宣元年齊人取濟西  
田則我以不義而賂齊夫齊以戰敗而賂我非我取  
之也而必書取專惡我也我以不義而賂齊非齊取  
之也而必書取專惡齊也取汶陽田雖專惡我然齊  
亦與有罪焉何者為人子孫不能守先祖之土地而  
輕以與人得無罪乎取濟西田雖專惡齊然我亦與

有罪焉何者為人子孫不能守先祖之土地而輕以  
與人得無罪乎夫春秋書法重地如此以為萬世守  
國者之戒也嗚呼冒頓夷狄也且能知地者國之本  
而不以與人可謂深得春秋重地之旨矣可不鑑哉  
銓為敷文閣直學士乞規恢遠圖疏曰臣頃坐異議竄  
斥嶺海者垂三十年自謂老於窮荒絕域不復齒搢紳  
之列豈意天假之年陛下登大位首賜收召臣獲保首  
領盡室生還復見天日之清明平昔區區之私鬱結而

不得伸者願畢之於旒扆之前指天誓心有死無貳故  
兩叅華禁首尾九年每一賜對臣未嘗不洗髓滌慮極  
其精誠期有以感動天聽誠以今日國讎未報陵寢未  
歸故疆未復臣所以夙夜痛心誓不與敵人共天者也  
伏惟皇帝陛下天錫勇智退託以不能惟兼聽是務每  
聞臣言曲賜優容稱其直諫臣摩厲此心日復一日不  
知老之將至迫於七十致仕之禮懇祈再三陛下委曲  
保全又復寵以延閣之美臣雖碎身粉骨不足以報天

地父母之恩輒敢極竭愚衷少裨國論之萬一伏望陛下體堯蹈舜轡禹轡湯規恢遠圖委任賢哲植正黜邪理財訓兵濟師練將運鰥卹孤然後布告中外大明君臣父子之義必報國讎必歸陵寢必復故疆混一區夏以副太上付託之重臣雖在畎畝死無所憾臣既陞辭即出脩門無復再瞻日表臣不勝惓惓愛君憂國之誠楊萬里上疏曰臣聞有天下之憂有君子之憂天下之憂憂其君之不為也君有為矣天下之喜而君子之憂

也蓋不為之君其心遲天下之所不快有為之君其志  
銳天下之所甚喜雖然喜者憂之所由寓也銳者遲之  
所由伏也夫何故銳則速不以速而成則以速而折天  
下之事有百全之成而無一折者乎求其成則必有以  
忍其折不忍其折則無務於速也速而折折而不忍則  
銳安得不變而為遲哉一朝之有為必至於終身而不  
為是故君子見其初而憂其終古之君子得有為之君  
而輔之以求立天下之大功則必有以養其君之志而

古之君子亦必有以自養其志詳其發而重其舉非詳其發也恐發之疎則一發足以廢百發非重其舉也恐舉之輕則一舉足以廢萬舉君臣之間其立也堅而其謀也老夫是以有成老則不欲速堅則雖可折而不可沮勝而不勇敗而不怯得而不喜失而不挫優游容與以待天下之隙而徐制其要領蓋昔者晉文之圖霸也二年而欲用其民子犯曰民未知義民知義矣又欲用之子犯曰民未知信民知信矣又欲用之子犯曰民未



知禮蓋文公之志踊躍奮迅而欲有為者一也而子犯  
三過之越王之報吳也四年而召范蠡問曰伐吳可乎  
曰未可也又一年又問曰伐吳可乎又曰未可也又一  
年又問焉又一年又問焉則皆曰未可也蓋越王之志  
踊躍奮迅而欲有為者四也而范蠡四拒之夫二臣者  
舉其君踊躍奮迅之氣而納之於抑鬱憤悶之地使朝  
夕咨嗟求逞而不得逞則無乃過乎蓋二臣者深知所以  
養其君之志懼其速而折折而沮也及其國力已強兵

氣已振事機之來而不可失勝形之見而不可禦則破楚滅吳了此事不終朝爾唐之德宗其志有一日不在於平藩鎮者乎然不勝其憤銳於遣三將而一伐一伐而生朱泚之變也則不敢言及於藩鎮者終其身求節度則與節度求宰相則與宰相故藩鎮之禍始於肅宗而成於德宗至於亡唐藩鎮亡之也德宗豈真成藩鎮之禍者哉速而折也折而沮也使德宗而不速則不折折而不沮則豈不猶可為也何遽至於晚年之姑息哉

文宗之志有一日不在於誅宦官者乎然不勝其憤銳於任訓注而一決一決而生甘露之禍也則不敢言及於宦官者終其身專制則聽其專制詆辱則甘其詆辱故宦官之禍始於明皇而成於文宗至於亡唐宦官亡之也文宗豈真成宦官之禍者哉速而折也折而沮也使文宗而不速則不折折不沮則豈不猶可為也何遽至於飲恨而沒哉二君之志本以求天下之大功而反以得天下之大禍則不養其志之患也頃者新天子

即位之初春秋鼎盛聖武天挺超然有必報不共戴天之心剋復神州之志天下仰目而望庶乎中興之有日也然親征之詔朝下而和議之詔夕出元戎之幕方開而信使之輶已駕紛紛擾擾以至於今而國論卒歸於和此其病安在哉蓋兆今日之和者符離之役也事不極則反不生勢不激則變不形暄甚則雨冬窮則春理固然也戰豈與和期哉和者戰之變也非求變也激而不得不變也且是役也天子之志固在於取中原也抑

嘗熟策之詳議之耶議之不詳也策之不熟也得城而不能有也成功而不能善後也是故前日之勇一變而為怯前日之銳一變而為鈍安得而不歸於和哉當其師之出也臣固知有今日之和也何則天子即位之初雖以堯舜為之亦不能以一日而洽威德於天下也威德未有以洽乎天下而欲一舉以求非常之功是非有成心也有倖心爾成乎心猶未必成乎外也心則倖矣獨能成乎外耶今日之事臣所大懼者懼天子之志沮

於一折而敵人有以窺吾之沮而天下之禍所從生也  
唐之二君蓋可鑒矣人有未富而先急於作大屋者屋  
未成而家已貧則他日一牆之頽一籬之缺而不敢議  
於補葺夫一牆易補也一籬易葺也其費與屋大不同  
也勇於屋之大而怯於藩牆之細則其志之沮也臣嘗  
讀蜀志至於劉昭烈三見諸葛亮之事則為之太息蓋  
昭烈以漢之裔欲誅曹操以復漢室此昭烈之雅志也  
然得徐州則失徐州得豫州則失豫州敗於呂布又敗

於曹操奔走狼狽於荆楚之間而無所於歸宜其憊而不復自振也而其見亮曰孤不度德欲信大義於天下而智術淺短遂用猖獗至于今日然志猶未已嗟乎昭烈者是時已老矣衰敗屢折而志猶未已此亮之所以樂於委身而願効其謀者也彼其徒手而成鼎峙之業其以此哉今天子以天下之半帶甲百萬表裏江淮安坐而指揮天下之豪傑以圖恢復祖宗之業而澡靖康之耻進則成混一之功守則成南北之勢何至於以一

小折自沮而汲汲以議和哉臣願天子堅昭烈之志而毋以唐之二君自處則中興之功天下未絕望也

萬里又論國勢曰臣聞善立國者以人成天而不以天敗人蓋國之所以廢興短長者天也而所以使其廢興短長者非天也人也惟人為能成天惟天亦能敗人非天之敗人也人實恃天以自敗而天亦不能如之何也且夫國於天地有與立焉古之國蓋有至弱而存有至強而亡者蓋有一再傳十餘年而遂滅有三四十世七



八百年而不絕者夫強者宜其不可亡一再傳者皆艱  
難創業之君宜其不可滅而乃至於滅亡何也弱者宜  
其朝不及夕傳世至於二三十君之後大抵不驕則怠  
宜其無以自立而乃至於長存又何也求之而無其形  
究之而無其端故曰天也國一國也有昨廢而今興有  
既亡而復存君一君也有朝弱而暮強有前衰而後盛  
夫豈不以人乎哉故夫善養身者能延既絕之年善謀  
國者能延既衰之祚人之所至天亦至焉故曰人也自

堯舜禹湯文武之為國計與孔子孟子之徒為世主言者大抵言人多於天而言天寡於人則憂夫有國者之以天敗人也臣竊觀天眷我國家已往之驗以卜方來之祚則知商周歷年之數未足為國家喻也臣蓋喜而憂之喜者天也而所憂者人也方敵人為靖康之役彼謂天下無復國家有也而民心依依戴其舊君我是以有南京之立方敵人為維揚之役彼謂深入窮侵之計不淺也而風潮効靈一隔千里我是以有海道之安方

金亮為江上之役彼謂投鞭於江可以利涉也而千艘一炬敵人遂敗我是以有江海之捷則天之維持全安我國家者屢危而屢不危愈搖而愈不拔其眷何如也則國家子孫萬世帝王之業了了在目中矣雖然天之所以為天者盡矣而人之所以為人者果盡也耶臣不得而知也果不盡耶臣不得而知也臣獨怪夫赤白囊一至則廟堂騷然而失措某所未有備某所未有兵募市人招武勇以為臨時應卒之計講解之議一許則君臣

欣然而相慶罷戎幕散舟師徹邊防息憂顧以享安逸  
無為之樂既君臣欣然矣而邊塵又動也則騷然之色  
復見既廟堂騷然矣而和議又集也則欣然之心復生  
此何為者耶千金之家不幸而大盜為之鄰前有父兄  
不共戴天之讐而後盡盜吾千金之產之意彼大盜者  
日夕聚惡少治兵刃伺間隙以圖我而未有以乘也則  
陽謂我曰吾與若為好也所謂千金之主人者將遂毀  
藩牆投挺刃晏然盤樂飲酒而不為之慮乎抑將外姑

與之好而陰益為之備也嗟乎千金之子能不忘於盜而為天下國家者不能不忘於敵天下之憂復有大於此者乎則所謂以人成天而不以天敗人者臣所不敢知也蓋臣聞之古之敵國對壘而未有息肩之期者其處之大略有四一曰謀二曰備三曰應四曰墮何謂謀晝不甘食夜不安寢君臣日夜蹙頰相顧以敵讎未滅為大憂以天下未一為大耻以宗廟社稷未有萬世不可亡之實為大懼收召豪傑選馬勵兵深謀密計期於

必取所謂卧榻之側豈容有鼻息雷鳴者太祖皇帝所以建一統之大業也何謂備謀人而羽翼未成也機會未至也釁隙未生也則遂不謀人也耶我不彼謀彼必我謀是故防之也豫而備之也周脩政刑求人才深溝高壘積粟治兵恐懼儆戒常若一日而敵三至也夫是以屹然有不可犯之堅動則可以制人靜則可以不制於人為客則可以百全為主則可以萬全矣孫仲謀之所以走曹操也何謂應欲為謀人而不能舉欲為備人

而不能勞政事紀綱守其常兵甲士馬因其舊其國不  
至於大治而亦不至於大亂敵不至則不慮其至敵至  
則徐應其至夫不慮其至而徐應其至者非有萬全之  
素也盡於一決以幸一勝爾故其勝也幸也非計也宗  
文帝之所以支佛狸也何謂墮既不能謀又不能備既  
不能備又不能應苟於安而不知危伏於其中媮於樂  
而不知憂寓於其間狎於敵人之詐而不悟墮於敵人  
之計而不疑至於覆亡其國則曰天也吳之所以誤於

越也謀人者其國興備人者其國安應人者其國僅存而墮於人者其國必亡有國者可不深懼而謹擇於此四者乎臣竊觀朝廷今日之大計而深所未喻也謀耶備耶應耶墮耶蓋亦不出於應而已矣敵至而能應愈於不能應非不可也而未善也何則餒而始學稼渴而始浚井得為善理家者乎且平居不為萬全之策而緩急乃幸於一勝之功可以勝也而不可以必勝也可以幸也而不可以數幸也臣懼朝廷今與敵人講解之後



輕信其情而不防其詐也歷下之兵一解而淮陰之師至鴻溝之境一分而垓下之禍作此往事明也臣願朝廷深為之備以待不測之警而後立國之大計臣得次第而歷陳之其二曰臣聞聖人不幸而當天下分裂之際者有所謂萬世之業有所謂數百年之業國無兩存無兩亡非有北無南則有南無北爾有能舉天下之二而一之此萬世之業也畫地以相俟據險以相拒攻則不足守則有餘此數百年之業也今聖天子既懲於一

舉而折則萬世之業其成未有形而其發未有候也而數百年之業亦獨擾擾而未求所定岌岌而未見所立則亦可謂不能也已非不能也能而不為也非不為也為而不果也果則為為則能矣昔司馬晉內有王敦蘇峻之亂外有劉石之敵晉宜不能乎晉也而無病乎江左十葉之基劉宋之初譙縱梗蜀盧循逼都下而姚氏慕容氏拓跋氏沸中原宋宜不能乎宋也而無害乎南朝數百年之祚晉宋之君何人哉使朝廷當此時將不

為國乎雖然此猶有天下之半也至於七十里而興商  
百里而造周湯文何人哉朝廷當此時將不為國乎雖  
然此猶有土也至於漢高帝一劍之外無餘物光武一  
牛之外無餘資而以創業以中興二君何人哉朝廷當  
此時又將不為國乎嗟乎以高光為之能以無國為有  
國也以湯文為之能以一國為天下也以晉宋為之能  
以危國為安國也然則天下豈有不可為之國哉亦存  
乎其人如何爾今也內無敦峻譙廬之猖獗外無劉石

之英雄而獨當一未亡之金人而又以全楚為家吳越為宮此楚莊吳閻閻子胥種蠡之所以強霸用武之國也西控全蜀南擁荆襄北據長淮此高帝先主孫仲謀楊行密之所以興起之根本也鉅海限其東而三江五湖繚其南北此古之六朝所恃以為不拔而不可兼得者也引巴蜀之饒漕江淮之粟市西戎之馬而號召荆楚奇材劍客之精銳此漢唐之所仰以為資者也奄是數者而有之而日夕惴焉不能以自存常若敵人之制

其命是挾千金而憂貧有孟賁之力而憂弱者也故曰  
非不能也能而不為也非不為也為而不果也使聖天  
子一日斷自一心不惑羣議卓然挈吾國而大有所建  
立則萬世之業為之有餘也而況數百年之業哉獨患  
乎因循頽墮忘其我之所可惜而徹其敵之所可忌者  
而已矣蓋吾之所可惜而吾不惜則凡所可惜者無所  
往而惜無所往而惜者亡之所從開也彼之有所忌而  
吾不示之以其所忌則凡所可忌者無所往而忌無所

往而忌者寇之所從召也昔者秦之滅六國非秦能滅六國也六國實自滅也不思久長之計而苟一日之安爭先割地以求和於秦地朝割而兵夕至蓋六國之君臣其初以為尺寸之地不足惜也不知夫國之亡乃自不惜尺寸始非尺寸之地能亡國也尺寸之不惜則不至於亡國則不止頃者敵人求唐鄧則與唐鄧求海泗則與海泗此何為者耶人有禦寇而不禦之垣之外乃毀垣以納之曰吾將拒之戶是得為善禦寇者乎夫室

以戶存戶以垣存也垣毀是無戶也室其得存乎蜀失漢中而劉禪降唐獻淮南而李景廌朝廷獨不見之耶此臣所謂患乎忘其我之所可惜者也漢高帝之西入關也兵之所至迎刃而解如此其銳也以仁義之師乘暴秦之亡如此其易也以高帝自將而子房為之謀如此其全也而不敢越宛擊秦非宛之能重秦也能病漢也盖宛者漢之後顧之病也宛一下則漢何病焉使秦人先得漢之所忌遣一將固守而不下則秦未易以歲

月入也異時朝廷舉長淮數千里而視之如隙地不葺一壘不置一卒使寇之去來如入無人之境此何為者耶議者猶曰是時敵之創痍未盡瘳而勢力未全盛也而今者狼然有窺吾淮甸南下牧馬之意朝廷儻復如前日置淮於度外則天下之大禍至矣虎之所以不可捕者穹崖深林入者凜然而又羆游乎其前豹伏乎其左此人之所以甚忌也使羆與豹皆去而虎立於途人孰不操戈以制之哉臧質壁盱眙而佛狸亟還劉仁瞻



堅守壽春而周師未得志朝廷獨不見之耶此臣所謂  
患乎徹其敵之所可忌也大抵敵人之求可以與可以  
無與天下之地可以無守可以守可以與者貨也可以  
無與者地也可以無守者已失之地也可以守者未失  
之地也可以無與而與焉可以守而不守焉今之大患  
不在此耶蓋海陵嘗求漢淮之地矣而光堯不與之地  
而與之戰臣願朝廷以光堯之塞海陵而塞敵之貪如  
蜀如荆襄如武昌如沿江朝廷固嘗嚴守備矣臣願今

日以待沿江之工而待淮凡淮之要害之地敵之所必  
攻者巨鎮如廬壽廣陵者則各擇一大將委以一面而  
付之重兵至於其它州郡則多其壁壘而葺其城池城  
池堅則可攻而不可下壁壘多則寇有牽而不敢越有  
大將重兵以居要則沿淮之州有所恃而無所懼兵法  
所謂常山之蛇者此也蓋固國者以江而不以淮固江  
者以淮而不以江而今之說者或曰淮不可守而江可  
恃嗟乎不恃江者江可恃也恃江則江不可恃矣昔者

陳後主盡召江北之諸將以朝正而韓擒虎賀若弼掩其虛以至江上陳之君臣猶曰天塹必無可濟之理且引周齊之兵五來皆敗以待隋言未既隋師濟矣甚矣夫江之誤南國也非江誤人之國也恃之者誤之也宮之竒曰虢虞之表也脣亡則齒寒江者淮之虞也淮者江之號也朝廷其勿恃江而恃淮勿恃淮而備淮則數百年之業可得而議矣不然臣恐未可以一朝居也或者又曰守淮善矣其如淮地之空曠何若夫江者紀涉

所謂備之不過數處直差易爾是不然有淮而後江者  
吾之江也無淮則江者非獨吾之江也亦敵之江也全  
而有之猶恐失之而況分之哉且吾之有淮以為空曠  
也使吾不有而敵有之彼以為空曠耶彼將居而耕耕  
而守守而伺則吾之一喘而彼聞一動而彼見人惟有  
所不可測而後不可圖引寇以自逼而日夕與之相目  
於一水之間則國尚何可為而敵尚何可備哉故夫江  
者誤人之國而紀涉之論又誤人之江者也且吳人者

欲淮而不得也非得淮而不欲也吾則有吳人之所無而又可棄吾之所有耶臣是以流涕而極言至此其三曰臣聞有為者必為其全何謂全不福其福不利其利是謂全夫為國者何嚮非福何擇非利而曰不福其福不利其利何也非不福其福也不福其禍中之福也非不利其利也不利其害中之利也夫何故貴乎福者貴其福而無禍貴乎利者貴其利而無害曰福焉而禍之所寄曰利焉而害之所藏是無福賢於福而不利賢於

利也故曰有為者必為其全不福其福不利其利是謂  
全今夫徑寸之珠潛於驪龍之頷而襲於萬仞之淵人  
將語我曰珠可得也其信者智乎其不信者智乎宜若  
信之者之智也殊不知身與珠孰重陸與淵孰安捐吾  
身而珠可得猶不為也況身可捐而珠不可得耶今士  
大夫孰不曰中原吾之舊物可取而不可棄雖然意則  
忠矣言則快矣而為國計則未也策今者不以今而以  
古料後者不以後而以今古者今之鏡也今者後之抵

也蓋觀之東晉乎蓋嘗有幽并矣至王浚劉琨亡而幽并亦亡又嘗有河南矣至祖逖亡而河南亦亡非數子之死而始亡幽并河南也數子之未死而幽并河南已亡矣蓋其存者名也其亡者實也蓋觀之劉宋乎蓋嘗得關中矣至高祖還而失關中又嘗得淮北矣至明帝北討之敗而失淮北非高祖之還明帝之敗而始失關中淮北也高祖之未還明帝之未敗而關中淮北已失矣蓋其得者名也其失者實也聞之曰雖鞭之長不及

馬腹何則功視時為成毀時視天為盈虛天之所至時亦至焉時之所至功亦至焉未聞時先天而得功先時而就者也是故天與時相遭則以百敗之漢高帝取百勝之項羽天與時相違則以劉葛之雄傑熟視孱弱之曹丕靖康之初金人之北歸也河北嘗為吾有矣紹興之間金人割地見還也河南長安嘗為吾有矣金亮之敗也海泗唐鄧又嘗為吾有矣隆興之舉也符離又嘗為吾有矣有則有矣而卒不有焉何也時也非時也天



也然則古之舉亦足以為今之懲今之事亦足以為後之規矣是故為今之計和不如戰戰不如守和則懈戰則力故曰和不如戰戰則殆守則全故曰戰不如守昔吳大帝時諸將各欲立功多陳便宜帝以問顧雍雍曰兵法戒於小利此等欲邀功名非為國也苟不足以損敵所不宜聽蜀將姜維每欲大舉伐魏費禕曰吾等不如諸葛丞相丞相猶不能定中原不如保國治民無決成敗於一舉嗟乎吳其以雍為懦而蜀其以維為壯矣

雖然未見其害雍信懦而維信壯也及諸葛恪以輕動無功而民怨姜維屢出黷武而國亡則顧雍費禕之言猶信噫宋德當天卜世萬億天不佑敵亡不及夕不待智者而後喻也然日有中昃月有盈缺天之道也而況國乎天之於我國家盖必有時矣可以俟不可以躁盖聖人之於時所不能者二曰去曰來所能者二曰待曰乘臣願朝廷盡人事以周其待待其來而決其乘不以小利而輕試吾之大技不以小鈍而中怠吾之大計則

中興之全功不在今日在何日耶燕嘗欲圖苻堅慕容  
農曰取果於未熟與自落不過旬日然其難易美惡相  
去遠矣金人之強不過苻堅其君臣萬萬不及堅朝廷  
盍少待哉

參知政事史浩奏曰臣聞古之得天下者皆由小以致  
大若湯以七十里文王以百里是也湯之一征天下始  
信故東征西怨南征北怨者徯其來而不至也是故  
師至其國若時雨降非謂使四方之民先歸湯之國也

文王三分天下有其二者有其心也是故至武王時始  
因商之旅其會如林非謂使天下之民先歸文王之國  
也若使民先歸其國則七十里之亳百里之豐何以容  
東西南北之人而所謂亳與豐之地方且疲於瞻養日  
益窮蹙又何暇脩文德以格遠人之心耶今陛下北有  
勁敵日為姦謀以撓我日縱流民以困我沿邊守臣由  
之不知方且日以招徠為事自去冬用兵以來歸正之  
官已滿五百皆高官大爵動欲添差見闕歸正之民不

知其數皆竭民膏血唯恐廩之不至數年之後國家之蓄積竭於此役東南之士大夫不得調東南之農民身口之奉不得自用安保其不起為盜賊而求衣食之資乎不於此時有以救之駸駸不已布滿東南蠶食既多國用益乏已來者不獲優恤必有悔心方來者待之愈薄必有怨心夫剥膚椎髓以奉之意者望其知恩而欲其為我用也若使怨悔之心生終亦何所濟此為國遠慮者莫不寒心也今說者必曰不如是不足以繫中原

人心夫內脩政事教化既明風俗既厚百姓家給而人足使彼之士民願立於朝願為之氓而不可得然後一旦興師恢復土宇皆為王臣則其心乃大悅如湯之后來其蘇武王之一怒而安也若吾之政化未施財力先屈國尚未可保安能繫中原之心乎凡為此論者皆慕古人之虛名失當今之實利者也臣願陛下密敕沿邊守臣其有襁負而至者諭之以久遠之計曰國家議戰與和皆為汝輩久此陷沒欲圖拯濟若為戰計則他日

得我故地汝皆吾民又何必捨墳墓棄親戚而來若為  
和計朝廷亦豈遂忘汝等宜各安本土以俟議定則彼  
必感我恤之之意深念之之心切將無所歸怨而敵聞  
之亦必知我國有人矣於是葺藩籬保形勢寬民力以  
固邦本募勇士以益軍籍政脩而教興國富而兵強機  
會之來豈有窮已一舉而得中原大開明堂受朝賀此  
成湯文王已試之明效也夫未至此時而先為計以自  
慮此敵之願後雖噬臍其無及矣利害得失之機較然

可見陛下不可不深察也儻未以臣言為然欲望聖慈斷自宸衷上取太上之訓下盡近臣之議以歸至當然後定其規撫使沿邊守臣有所遵守

浩又上奏曰臣聞棄實而務名捨近而謀遠見利而忘害此三者天下之大弊古今之至戒也臣比者極論招納歸正人之非雖荷聖慈已賜開納尚慮議者或有異同臣請得申言其詳夫自淮泗之北燕趙以南幅員萬里皆我故疆若使朝廷根本已立人材已衆功無僭賞



罪無佚罰兵強國富事力有餘以陛下英武之資乘中原愛戴之心一舉而取之宅中圖大以復舊物則天下之議孰敢以為非今既未能乃區區然招集逋逃之人以為繫中原之心此臣所謂棄實而務名一弊也自去歲金人南下之後兩淮蕩然驅虜殺戮不可勝計井堙木刊積骸如山慟哭之聲至今未已調度日繁江左重困屯戍雖遣藩籬未固此皆當如飢渴如焚溺日夜圖之者今未見大有措畫而廟堂之上率常以太半日力

整會歸正人某人乞官某人援例以廟堂猶如此則宣撫司沿邊諸軍帥司州郡又可知矣此臣所謂捨近而謀遠二弊也北人初來扶老攜幼莫不皆言去虎狼歸父母嗚噫流涕以手加額不知者觀之真若可喜然此輩小人何常之有廩給祿賞少不厭其無涯之心則怨詈並作未必不剌取國事歸報敵境況又其間往往有本心為間探而來者此臣所謂見利而忘害三弊也以此三說反覆究繹招納利害可以立決加之敵情難測

謫詐萬端今北人將片紙來者即與官僧道雖無度牒  
但持戒牒來者即與度牒若敵人設計多作偽告偽牒  
源源而來上則竭國力以祿養歸正官下則陰壞度牒  
之法我尚為有謀也哉且中國士大夫雖身登科第家  
世公侯一有去失坐廢終身而歸正官則一切不問是  
仕於敵人者何其幸而仕於天朝者何其不幸耶中國  
士民欲為僧道者由買度牒以至書填受戒非四五百  
千不可而歸正僧道則一切不問是生於敵界者何其

幸而生於王土者何其不幸耶臣惓惓之實欲望陛下  
棄名取實以集大勲先近後遠以安邊鄙見利思害以  
杜亂萌異同之論一以理決之昔吐蕃欲取唐維州陰  
遣婦人嫁守閤者生子長大守閤而吐蕃入寇遂開關  
納之宣和中郭樂師入朝請擊鞠牟陀岡乃默視可作  
營壘之地其後金人大入果集于此則招納之事豈可  
忽哉豈可忽哉伏惟留神采擇

川陝宣諭使虞允文上言曰臣以孤遠之蹤曲蒙陛下

親擢聖恩不一實為非常之遇但以才力凡微未有豪  
髮報効媿懼并心敢因使令輒以今日不可失之機仰  
干四聰之聽伏惟陛下聖智默運成筭不遺規模之遠  
固已素定用敢冒昧裨萬分一臣既聞敵中之亂敵兵  
在中原者不多實天相陛下恢復之時而形勢便利莫  
如陝西蓋得兵得馬得糧可以壯國威可以足軍餉欲  
守則有險可恃欲戰則有資可憑自古進取天下固有  
次序而莫先於此臣嘗所憂者大將相與因循無一肯

出力為國家任責兩日來吳拱出示吳璘三書謹錄進  
呈臣觀其書意知敵為甚怯知其兵為可用知民心為  
已歸知糧道可以取足於西人又知其疾之已去老之  
可憂而自勉於一舉而臣所不知者朝廷怯於立事和  
戰未決尚以為疑也自敵使及境而去或以為敵中方  
亂有所未暇或以為敵人未肯歸疆將有所要致於我  
以臣愚慮二說皆可置不問所當急者今日之機如因  
璘之意而用其機此在陛下與二三大臣斷以一言而

已臣博采輿論謂中原之敵不多必無深入之憂若且

令董庠以本管兵守淮東郭振以四統制兵守淮西趙

搏駐信陽李道迫新野

唐鄧之間

各因其險而固守勿與敵

戰因得息兵以待用先令吳拱選精兵二萬人從鄧州

路與王彥會於商州以萬人守潼關使河南之敵不能

進兵以援長安又以萬人與彥合力進討而吳璘姚仲

擁大兵而出西人知朝廷大舉倡義而應者必甚於今

日官軍聲震關輔則寶雞之敵知其無援又為西人之

所共棄若不請降亦必引兵渡河而去國家得於此時  
收兵籍馬因長安之糧而取河南因河南之糧而會諸  
軍以取汴則兵力全而可以省諸道之運至如兩河之  
地因民之心可傳檄而定矣臣聞兵好合而惡分時難  
得而易失欲望陛下與二三大臣察納其說而熟計之  
潛以一定之說分命諸將使戮力以收不世之功天下  
幸甚臣迫於愚忠抵冒天威伏深震懼

允文又上言曰臣竊惟藝祖皇帝創業之初削平諸國



首會襄陽之兵以取荆南蓋天下勝勢所在先得之則  
雄視吳蜀一統之祚實始於此今陛下畱神於襄漢之  
上游控吳蜀之全壤規摹弘遠得藝祖之遺意天開聖  
哲先後同符而議者謂自古以來蜀以重山為險吳以  
長江為險而荆襄之地平原廣袤無一山一水之限隔  
故三國之後以至南北之分凡皆以兵為險良將勁卒  
聚為重鎮方冊可考也道路錯出不可以數計而其大  
者有六自陝虢出盧氏可以直抵歸州自光化出茨湖

可以直抵夷陵自汝州出新野可以直抵襄陽自唐州  
出棗陽可以直抵郢州自蔡州出信陽之三關可以直  
抵德安府自陳州出宛丘新息可以直抵光黃彌互數  
千里實為坦塗皆當以兵為險之地也兵厚則險固理  
之自然而今之備兵反薄於守吳守蜀之數一失支梧  
敵勢橫潰吳蜀之形釐而為二屯兵雖多首尾莫應甚  
可慮也伏願陛下曲軫淵衷下臣之章於腹心大臣議  
所以益兵之策庶幾不失藝祖所以先重荆襄之意為

陛下恢復之基天下幸甚

歷代名臣奏議卷九十三

欽定四庫全書

歷代名臣奏議卷九十四

明 楊士奇等 撰

經國

宋孝宗時建康府通判辛棄疾進美芹十論曰臣聞事未至而預圖則處之常有餘事既至而計則應之常不足敵人憑陵中夏臣子思酬國耻普天率土此心未嘗一日忘臣之家世受廩濟南代膺閭寄荷國厚恩大父

臣贊以族衆拙於脫身被汙敵官留京師歷宿毫涉沂海非其志也每退食輒引臣輩登高望遠指畫山河思投轡而起以紓君父所不共戴天之憤嘗令臣兩隨計吏抵燕山諦觀形勢謀未及遂大父臣贊下世粵辛巳歲金亮南下中原之民屯聚蜂起臣嘗鳩衆二千隸耿京為掌書記與圖恢復共籍兵二十五萬納款于朝不幸變生肘腋事乃大謬負抱愚忠填鬱腸肺官閒心定竊伏思念今日之勢朝廷一於持重以為成謀敵人利

於嘗試以為得計故和戰之權常出於敵而我特從而應之是以燕山之和未幾而京城之圍急城下之盟方成而兩宮之狩遠秦檜之和反以滋金亮之狂彼利則戰倦則和詭譎狙詐我實何有惟是張浚苻離之師猶有生氣雖勝不慮敗事非十全然計其所喪方諸既和之後投閒蹂躪猶未若是之酷而不識兵者徒見勝不可保之為害而不悟夫和而不可恃為膏肓之大病遂亟辭古以為深戒臣竊謂恢復自有定謀非苻離小勝

負之可懲而朝廷公卿過慮不言兵之可惜也古人言  
不以小挫而沮吾大計正以此耳恭惟皇帝陛下聰明  
神武灼見事幾雖光武明謨憲宗果斷所難比擬一介  
敵人尚勞宵旰此正天下之士獻謀効命之秋臣雖至  
愚且陋何能有知徒以忠憤所激不能自己以為今日  
敵人實有弊之可乘而朝廷上策惟預備乃無患故罄  
竭精懇不自忖量撰成禦敵十論名曰美芹其三言敵  
人之弊其七言朝廷之所當行先審其勢次察其情復



觀其釁則敵之虛實吾既詳之矣然後以其七說次第而用之敵固在吾目中惟陛下畱乙夜之神沈先物之幾志在必行無惑羣議庶乎雪耻酬百王除兇報千古之烈無遜于唐太宗典冠舉衣以復韓侯雖越職之罪難逃野人美芹而獻于君亦愛主之誠可取惟陛下赦其狂僭而憐其愚忠斧鑕餘生實不勝萬幸萬幸之至其審勢曰用兵之道形與勢二不知而一之則沮於形眩於勢而勝不可圖且坐受其斃矣何謂形小大是也

何謂勢虛實是也土地之廣財賦之多士馬之衆此形也非勢也形可舉以示威不可用以必勝譬如轉嵌巖于千仞之山轟然其聲鬼然其形非不大可畏也然而塹畱木拒未容於直遂有能迂回而避禦之至力殺形禁則人得跨而踰之矣若夫勢則不然有器必可用有用必可濟譬注矢石于高墉之上操縱自我不係于人有軼而過者抨擊中射惟意所向此實之可慮也自今論之敵人雖有嵌巖可畏之形而無矢石必可用之勢

其舉以示吾者特以威而疑我也謂欲用以求勝者固知其未必能也彼欲致疑吾且信之以為可疑彼未必能吾且意其或能是亦未詳夫形勢之辨耳臣請得而條陳之敵人之地東薄于海西控于夏南抵于淮北極于蒙地非不廣也敵人之財發兵于民而無養兵之費靳恩於郊而無泛恩之賞又輔之以歲幣之相仍橫斂之不卹則財非不多也沙漠之地馬所生焉射御長技人皆習焉則其兵又可謂之衆矣以此之形時出而震

我亦在所可慮而臣獨以為不足卹者蓋敵之地雖名為廣其實易分惟其無事兵劫形制若可糾合一有驚擾則忿怒紛爭割據蜂起辛巳之變蕭哲伯反于遼趙開反于密魏勝反于海王友直反于魏耿京反于齊魯親而葛王又反于燕其餘紛紛所在而是此則已然之明驗是一不足慮也敵人之財雖名為多其實難恃得吾歲幣惟金與帛可以備賞而不可以養士中原廩害可以養士而不能保其無失蓋敵政厯而官吏橫常

賦供億民粗可支意外而有需公實取一而吏七八之  
民不堪而叛叛則財不可得而反喪其資是二不足慮  
也若其為兵名之曰多又實難調而易潰且如中原所  
簽謂之大漢軍者皆其父祖殘于蹂踐之餘田宅罄於  
槌剥之酷怨憤所積其心不一而沙漠所簽者越在萬  
里之外雖其數可以百萬計而道里遼絕資糧器甲一  
切取辦於民賦輸調發非一歲而不可至始金亮南下  
之時皆是誅脅酋長破滅資產人乃肯從未幾中道竄

歸者已不可制則又三不足慮也又況金國今用事之人雜以契丹中原江南之士上下猜防議論齟齬非如前日尼雅滿烏珠輩之叶且骨肉間僭弑成風如聞偽許王以庶長出守於汴私收民心而嫡少嘗暴之於父此豈能終以無事者哉我有三不足慮彼有三無能為而重之以有腹心之疾是殆自保之不暇何以謀人臣抑聞古之善覘人國者如良醫之切脉知其受病之處而逆其必殞之期初不為肥瘠而易其智官渡之師袁紹

未遽弱也曹操見之以為終且自斃者以嫡庶不定而  
知之咸陽之都會稽之游秦尚自強也高祖見之以為  
當如是矣項籍見之以為可取而代之者以民怨已深  
而知之蓋國之亡未有如民怨嫡庶不定之為酷敵今  
並有之欲不亡何待臣故曰形與勢異惟陛下實深察  
之其察情曰兩敵相持無以得其情則疑疑故易駭駭  
而應之必不能詳有以得其情則定定故不可惑不可  
惑而聽彼之自擾則權常在我而敵實受其弊矣古之

善用兵者非能務為必勝而能謀為不可勝蓋不可勝者乃所以徐圖必勝之功也我欲勝彼亦志於勝誰肯處其敗勝敗之情戰於中而勝敗之機未有所決彼或以兵來吾敢謂其張虛聲以耀我乎彼或以兵遁吾敢謂其非匿形以誘我乎是皆未敢也然則如之何曰權然後知輕重度然後知長短定故也它人有心予忖度之審故也能定而審敵情雖萬里之遠可坐察矣今吾藏戰于守未戰而常為必戰之待寓勝于敵未勝而常



有必勝之理彼誠虛聲以耀我我以靜應而不輕動彼誠匿形以誘我我有素備而不可以乘勝敗既不能為吾亂則固神閒而氣定矣然後徐以吾之心度彼之情吾猶是彼亦猶是南北雖有異慮休戚豈有異趣哉敵人情偽臣嘗熟論之矣蓋其性剽悍心不肯自間逆之則怒怒而後戰順之則喜喜必致賂蓋怒我者忌我也喜我者狎我也彼何嘗不欲戰又何嘗不言和惟其實欲戰而乃以和狎我惟其實欲和而乃以戰要我此所

以和無定論而戰無常勢也尤不可以不察曩者烏珠之死固嘗囑其徒使與我和曰韓張劉岳近皆習兵恐非若輩所敵則是其情真欲和矣然而未嘗不進而求戰者計出於忌我而要我也劉豫之廢亶嘗慮無以守中原則請割三京亶之弑亮常懼吾有問罪之師則又謀割三京而還梓宮亮之殞褒又嘗緩我追北之師則復謀割白溝河以丈人行事我是其情亦真欲和矣非詐也未幾亶之所割視吾所守之人非其敵則不旋踵

而復取之亮之所謀窺吾遣賀之使知其無能為則中輟而萌辛巳之逆衷之所謀悟有班師之失無意於襲則又反覆而有意外之請夫既云和矣而復中輟者盖用其狎而謀勝于我也今日之事揆諸敵情是有三不敢必戰二必欲嘗試何以言之空國之師商監不遠彼必不肯再用危道萬一猖獗特不過調沿邊戍卒而已戍卒豈有能必其勝此一不敢必戰也海泗唐鄧等州吾既得之彼用師三年而無成則我有攻守之士而敵

人已非前日之比此二不敢必戰也契丹諸部側目于其後中原之士扼腕于其前令之雖不得不從從之未必不反此三不敢必戰也有三不敢必戰之形懼吾之窺其弱而絕歲幣則其勢不得不張大以要我此一欲嘗試也貪而志欲得求不能充其所欲心惟務于僥倖謀不暇于萬全此二欲嘗試也且彼誠欲戰耶則必不肯張皇以速我之備且如金亮始謀南下之時劉麟蔡松年一探其意而導之則麟逐而松年鳩惡其露機也

今誠必戰豈欲人遂知之乎彼誠不敢必戰邪貪殘無義忿不顧敗彼何所卹以母之親兄之長一忤其意一利其位亮猶弑之何有於我況今沿海造艦沿淮治具包藏禍心有隙皆可投敢謂之終遂不戰乎大抵今彼雖無必敢戰之心而吾亦不可不防其欲嘗試之舉彼於高麗西夏氣足以吞之故於其使之至也坦然待之而無他惟吾使命之去則多方腆鮮曲意防備如人見牛羊未嘗作色而遇虎豹則厲聲奮臂以加之此又足

以見其深有忌于我也彼知有忌我獨無忌哉我之所  
忌不在于敵欲必戰而在于敵幸勝以踰淮而遂守淮  
以困我則吾受其病矣禦之之術臣具于守淮篇昔者  
黥布之心為身而不顧後必出下策薛公知之以告高  
祖而布遂成擒先零之心恐漢而疑單于解仇結約充  
國知之以告宣帝而先零自速敗薛公充國非有風角  
鳥占之勝枯莖朽骨之技亦惟心定而慮審耳朝廷心  
定而慮審何情不可得何功不可成不求敵情之知而

觀彼虛聲詭勢以為進退者非特重困吾力且失夫制勝之機為可惜臣故曰知敵之情而為之處者綽綽乎其有餘矣其觀釁曰自古天下離合之勢常係乎民心民心叛服之由實基于喜怒喜怒之方形視之若未有休戚喜怒之既積離合始決而不可制矣何則喜怒之情有血氣者皆有之飽而愉煖而適遽使之飢寒則怨仰而視俯而育遽使之捐棄則痛冤而求伸憤而求泄至於無所控告則怒怨深痛鉅而怒盈服則合叛則離

秦漢之際離合之變於此可以觀矣秦人之法慘刻凝密而漢則破觚為圓與民休戚天下不得不喜漢而怒秦秦人則役繁賦重不卹而漢則寬仁大度務從簡約天下不得不喜漢而怒秦怒之方形秦自若也怒之既積則喜而有所屬秦始不得自保遂離而合于漢矣方今中原之民其心果何如哉二百年為朝廷赤子耕而食蠶而衣富者安貧者濟賦輕役寡求得而欲遂今陷于敵彼視吾民如晚妾之御嫡子愛憎自殊不復顧惜



方僭割之時彼守未固此訥未定猶勉強姑息以示恩  
時肆誅戮以賈威既久稍玩真情遂出分布州縣半其  
部落分朋植黨仇滅我民民有不平訟之於官則彼常  
勝而我民則飲氣以茹屈田疇相隣彼人則強而奪之  
孳畜相雜彼人則盜而有之民之至愛者子孫簽軍之  
令下則貧富不問而丁壯必行民之所惜者財力營築  
饋餉之役興則空室以往而休息無期有常產者困窶  
無置錙者凍餒民初未敢遽叛者猶徇于苟且之安而

怵於積威之末辛巳之歲相挺以興矯首南望思戀舊  
主者怨已深痛已鉅而怒已盈也金亮自知形禁勢格  
巢穴迴遙恐狂謀無成而竄身無所故疾趨淮上僥倖  
一勝以謀潰中原之心而求歸也此機不一再而朝廷  
慮不及此中原義兵尋亦潰散吁甚可追惜也今而觀  
之中原之民業嘗叛敵敵人必不能釋然於其心而吾  
民亦豈能自安而無疑乎疑則慮患深操心危是以易  
動而輕叛朝廷未有意于恢復則已誠有意焉莫若於

其無事之時張大聲勢以聳之使知朝廷儼然有可恃之資存撫新附以誘之使知朝廷有不忘中原之心如是則一旦緩急彼將轉相告諭翕然而起爭為吾之應矣又況今日中原之民非昔日中原之民曩者民習於治而不知兵不意之禍如蜂蠆作于懷袖知者不暇謀勇者不及怒自亂離以來心安于斬伐而力閑於攻守敵人雖暴有王師為之援民心堅矣馮婦雖攘臂其為士笑之孟子曰為湯武驅民者桀與紂也臣亦謂今之

中原離合之釁已開敵人不動則已誠動焉是特為陛下驅民而已惟靜以待之彼不亡何待其自治曰臣聞今之論天下者皆曰南北有定勢吳楚之脆弱不足以爭衡于中原臣之說曰古今有常理域外之人民不可以久安于內地夫所謂南北定勢者粵自漢鼎之亡天下離而為南北吳不能以取魏而晉卒以併吳晉不能以取中原而陳亦終斃於隋與夫藝祖皇帝之取南唐取吳越天下之士遂以為東南地薄兵脆將非命世之

雄其勢固至於此而蔡謨亦謂度今諸人必不能辦此  
吾見韓盧東郭兔俱斃而已臣以謂吳不能以取魏者  
蓋孫氏之割據曹氏之猜雄其德本無以相過而西蜀  
之地又分於劉備雖願以兵窺魏勢不可得也晉之不  
能取中原者一時諸戎皆有豪傑之風晉之強臣方內  
自專制擁兵上流動輒問鼎自治如此何暇謀人宋齊  
梁陳之間其君臣又皆以一戰之勝蔑其君而奪之位  
其心蓋僥倖于人之不我攻而所以攻人者皆其自固

也至于南唐吳越之時適當聖人之興理固應爾無足  
恠者由此觀之所遭者然非定勢也且方今南北之勢  
較之彼時亦大異矣地方萬里而劫於金人之一姓彼  
其國大而上下交征政厯而軍民相怨平居無事亦規  
規然模倣古聖賢太平之事以誑亂其耳目是以其國  
可以言靜而不可以言動其民可與共安而不可與共  
危非如晉末諸戎四分五裂若周秦之戰國唐季之藩  
鎮皆家自為國國自為敵而貪殘吞噬剽悍勁勇之習

純用而不雜也且六朝之君其祖宗德澤涵養浸漬之  
難忘而中原民心眷戀依依而不去者又非得為今日  
比臣故曰較之彼時南北之勢大異矣當秦之時關東  
強國莫楚若也而秦楚相遇動以數十萬之衆見屠于  
秦君為秦虜而地為秦墟自當時言之是南北勇怯不  
敵之明驗而項梁乃能以吳楚子弟驅而之趙救鉅鹿  
破章邯諸侯之軍十餘壁皆莫敢動觀楚之戰士無不  
一當十諸侯之兵皆人人惴恐卒以阬秦軍入函谷焚

咸陽殺子嬰是又可以南北勇怯論哉方懷王入秦時  
楚人言之曰楚雖三戶亡秦必楚夫彼豈能逆知其事  
之必至於此耶蓋天道好還亦以其理而推之耳故臣  
直取古今常理而論之夫所謂古今常理者逆順之相  
形盛衰之相尋如符契之必同寒暑之必至今敵人所  
以取之者至逆也然其所居者亦盛矣以順居盛猶有  
衰焉以逆居盛固無衰乎臣之所謂理者此也不然遐  
裔之長而據有中夏子孫又有泰山萬世之安古今豈



有是事哉今之議者皆痛懲往者之事而劫於積威之  
後不推項籍之亡秦而猥以蔡謨之論晉者以藉口是  
猶懷千金之璧不能幹營低昂而搖尾于販夫懲蝮蛇  
之毒不能詳覈真偽而褫魄于雕弓亦已過矣故臣願  
陛下姑以光復舊物而自期不以六朝之勢而自卑精  
心強力日與二三大臣講求古今南北之勢知其不侔  
而不為之惑則臣固當為陛下言自治之策今之所以  
自治者不勝其多也官吏之盛否民力之優困財用之

豐耗士卒之強弱器械之良楮邊備之廢置此數者皆有司之事陛下亦次第而行之臣不能悉舉也顧今有大者二陛下知之而未果行大臣難之而不敢發者一曰絕歲幣二曰都金陵臣聞今之所以待敵以緡計者二百餘萬以天下之大而為生靈社稷計曾何二百餘萬之足云臣不為二百餘萬緡惜也錢塘金陵俱在大江之南而其形勢相去亦無幾矣豈以為是數百里之遠而遽有強弱之辨哉臣不為數百里計也然而絕歲

幣則財用未可以遽富都金陵則中原未可以遽復是三尺童子之所知臣之區區以是為言者蓋古之英雄撥亂之君必先內有以作三軍之氣外有以破敵人心故曰未戰養其氣又曰先人有奪人之心今則不然待敵則恃驕好於金帛之間立國則借形勢於湖山之險望實俱喪莫此為甚使吾內之三軍習知其上之人畏怯退避之如此以為金人必不可敵戰守必不可恃雖有剛心勇氣亦銷鑠委靡而不振臣不知緩急將誰

使之戰哉。借使戰其能必勝乎。外之中原民心以為朝廷置我於度外。謂吾無事。則知自備而已。有事則將自救之。不暇向之袒臂疾呼而背金亮之令為吾響應者。他日必無若是之捷也。如是則敵人將安意肆志而為吾患。今絕歲幣都金陵。其形必至於戰。天下有戰形矣。然後三軍有所怒而思奮。中原有所恃而思亂。陛下間取其二百餘萬緡者以資吾養兵賞勞之費。豈不為朝廷之利乎。然此二者在今日未可遽行。臣觀敵人之情。

玩吾之重戰而所求未能充其欲不過一二年必以戰而要我苟因其要我而遂絕之則彼亦將自沮而權固在我矣議者必曰朝廷全盛時西北二敵亦不免于賂今我有天下之半而敵倍西北之勢雖欲不賂得乎臣應之曰是趙之所以待秦也昔者秦攻邯鄲而去趙將割六縣而與之和虞卿曰秦之攻趙也倦而歸乎抑其力尚能進且愛我而不攻乎王曰秦之攻我也不遺餘力矣必以倦而歸矣虞卿曰秦以其力攻其力所不能

取倦而歸王又以其力之不能攻以資之是助秦自攻也臣以為虞卿之所以謀趙者是今日之勢也且今日之勢議者固以東晉自卑矣求之於晉彼亦何嘗棄金陵輸歲幣乎臣竊觀陛下聖文神武同符祖宗必將陵跨漢唐撫有中夏然後為稱豈能鬱鬱久居此者乎臣願陛下酌古以御今毋惑紛紜之論則恢復之功可必其有成古人云謀及卿士謀及庶人又曰作屋道邊三年不成蓋謀貴衆斷貴獨惟陛下深察之其守隄曰臣

聞用兵之道無所不備則有所必分知所必守則不必  
皆備何則精兵驍騎十萬之屯山峙雷動其勢自雄以  
此為備則其誰敢乘離屯為十屯不過萬力寡氣沮以  
此為備則備不足恃此聚屯分屯之利害也臣嘗觀兩  
淮之戰皆以備多而力寡兵懾而氣沮奔走于不必守  
之地而嬰敵人遠鬪之鋒故十戰而九敗其所以得畫  
江而守者幸也且今敵人之情臣固已論之矣要不過  
以邊兵而入寇幸成功而無內禍使之踰淮將有民而

撫之有城而守之則始足以爲吾患夫守江而喪淮吳  
陳南唐之事可見也且我入彼出我出彼入曠日持久  
何事不生曩者金人之將曰韓常劉豫之相曰馮長寧  
者皆嘗以是導之詎知其他日之計終不出于此乎故  
臣以謂守淮之道無懼其必來當使之兵交而亟去無  
幸其必去當使之他日必不敢犯也爲是策者在於彼  
能入吾之地而不能得吾之戰彼能攻吾之城吾能入  
彼之地然而非備寡力專則不能也且環淮爲郡凡幾



為郡之屯又幾退淮而江為重鎮曰鄂渚曰金陵曰京  
口以至于行都扈蹕之兵其將皆有定營其營皆有定  
數此不可省也環淮必欲皆備則是以有限之兵而用  
無所不備之策兵分勢弱必不可以折其衝以臣策之  
不若聚兵為屯以守為戰庶乎敵來不足以為吾憂而  
我進乃可以為彼患也聚兵之說如何敵人之來自淮  
而東必道楚以趣揚自淮而西必道濠以趣真與道壽  
以趣和自荆襄而來必道襄陽以趣荆今吾擇精騎十

萬分屯于山陽濠梁襄陽三處而於揚或和置一大府以督之敵攻山陽則堅壁勿戰而虓盱眙高郵以餌之使濠梁分其半與督府之兵橫擊之或絕餉道或邀歸途敵併力于山陽則襄陽之師出唐鄧以擾之敵攻濠梁則堅壁勿戰而虓廬壽以餌之使山陽分其半與督府之兵亦橫擊之敵併力于濠梁而襄陽之師亦然敵攻襄陽則堅壁勿戰而虓郢復以餌之敵無所獲亦將聚淮北之兵以併力于此我則以濠梁之兵制其歸而

山陽之兵自汴陽以擾沂海此正所謂不恃敵之不敢  
攻而恃吾能攻彼之所必救也臣竊謂解雜亂紛糾者  
不控券救鬪者不搏搢批亢擣虛形格勢禁則自為解  
矣昔人用兵多出于此故魏趙相攻齊師救趙田忌引  
兵疾走大梁則魏兵釋趙而自救齊師因大破之於桂  
陵後唐莊宗與梁相持於揚劉德勝之間蓋嘗蹙而不  
勝其後用郭崇韜之策七日入汴而梁亡兵家形勢從  
古以然議者必曰我知擣虛以進彼亦將調兵以拒進

遇其實未見其虛是大不然彼沿邊為守其兵不過數萬既已厚屯于三城之衝其餘不容復多兵少而力不足謂能當我全師者又非其所慮也又況彼縱得淮而民不服且有江以為之阻則猶未足以為利我得中原而輦壺迎降民心自固且將不為吾守乎如此則在我者甚堅而在彼者甚瑕全吾所甚堅攻彼所甚瑕此臣所謂兵交而必亟去兵去而不敢復犯者此也嗚呼安得斯人而與之論天下也哉其屯田曰趙克國論備邊

之計曰湟中積穀三百萬斛則羌人不敢動李廣武為  
成安君謀曰要其輜重十日不至則二將之頭可致者  
此言用兵制勝以糧為先轉餉給軍以通為利也必欲  
使糧足而餉無間絕之憂惟屯田為善而屯田蓋亦難  
行國家經畫于今幾年而曾未覩夫實效者所以驅而  
使之耕者非其人所以為之任其責者非其吏故利未  
十百而害已千萬矣名曰屯田其實重費以斂怨也何  
以言之市井無賴小人惟其懶而不事事而迫於飢寒

故甘捐軀于軍伍以就衣食而苟閒縱一旦警急擐甲操戈以當矢石其心固偃然自分曰向者吾無事而幸飽煖于官今焉官有事而責死力于我且戰勝猶有累資補秩之望故安之而不辭今遽而使之屯田則是無事而不免耕耘之苦有事而又履夫攻守之危彼必曰吾能耕以食豈不能從富民租佃以為生而輕失身于黥戮上能驅我于萬死豈不能捐穀帛以養我而重役我以辛勤不平之氣無所發洩在畎畝則邀奪民田脅

掠酒肴以肆無稽踐行陣則呼憤扼腕疾視長上而不  
為用且曰吾自耕自食官何用我焉是誠未覩夫享成  
之利也鹵莽滅裂徒費糧種祇見有害未聞獲利此未  
為策之善如臣之說則曰向者之兵怠惰而不盡力向  
者之吏苟且而應故事不如籍歸正軍民釐為保伍擇  
歸正不釐務官擇為長貳使之專董其事且彼自敵中  
被簽而來未耨之事蓋所素習且其生同鄉井其情相  
得上令下從不至生事惟官之計其間田頃畝之數與

夫歸正軍民之目土人已占之田不更動搖以重驚擾  
歸正之人家給百畝而分為二等為之兵者田之所收  
則盡以予之為之民者十分稅一則以為凶荒賑濟之  
儲室廬器具糧種之法一切遵舊使得植桑麻蓄雞豚  
以為歲時伏臘婚嫁之資彼必忘其流徙便於生養無  
事則長貳為勸農之官有事則長貳為主兵之將許其  
理為資考久於其任使得悉心於教勸而委守臣監司  
覈其勞績奏與遷秩而不限舉主人孰不更相勸勉以



赴功名之會哉且今歸正軍民散在江淮而此方之人  
例以異壤視之不幸而主將亦以其歸正則求自釋於  
廟堂又痛事形迹愈不加卹間有挾不平出怨語重典  
已繫其足矣所謂小名目者仰俸給為活胥吏沮抑何  
嘗以時得嗚呼此誠可憫也誠非朝廷所以懷誘中原  
忠義之術也聞之曰因其不足而利之利未四五而恩  
踰九十此正屯田非特為國家便而且亦為歸正軍民  
之福議者必曰歸正之人常懷異心羣而聚之慮復生

變是大不然也且和親之後沿江歸正軍民官吏失所以撫摩之惠相扳北歸者莫計當時邊吏亦皆聽之而莫為制此豈獨歸正人之罪今之畱者既少安矣更為屯田以處之則人有常產而上無重斂彼何苦叛去以甘敵人橫暴之誅求哉若又曰恐其竊發且人惟不自聊賴乃攘奪以苟生誠豐飫矣何苦如是飢者易為食必不然也誠使果爾踈而遠之於江外不猶愈于聚乎內而重驚擾乎且天下之事逆慮其害而不敢求其利

亦不可言智矣蓋今所謂御前諸軍者待之素厚而養之素優故驕驕則不可復使此甚易曉也若夫州郡之卒異于是彼非天子爪牙之故可以勞之而不怨而其大半出于農桑失業之徒故狎于野而不怨往年嘗獵其丁壯勁勇者為一軍矣臣以謂可輩徙此軍視歸正軍民之數倍而發之使阡陌相連廬舍相望並耕乎兩淮之間彼其名素賤必不敢倨視歸正軍民而媒怨而歸正軍民視之猶江南之兵也亦必有所忌而不敢逞

勢足以禁歸正軍民之變力足以盡屯田之利計有出于此者乎昔商之頑民相率為亂周公不誅而遷之洛邑曰商之諸臣乃湏于酒勿庸殺之姑惟教之其後康王命畢公又曰不臧厥臧民罔攸勸始則遷其頑而教之終則擇其善而用之聖人治天下未嘗絕物固如此今歸正人聚于兩淮而屯田以居之覈其勞績而祿秩以誘之內以節冗食之費外以省轉餉之勞以銷桀驁之變此正周人待商民之法秦人使人自為戰之術而

井田兵農之遺制也況皆吾舊赤子非如商民在周之  
有異念以術使之天下豈有不濟之事哉其致勇曰臣  
聞行陣無死命之士則將雖勇而戰不能必勝邊陲無  
死事之將則相雖賢而功不能必成將驕卒惰無事則  
已有事則其弊望敵先遁臨敵遂奔幾何而不敗國家  
事人君責成于宰相宰相身任乎天下可不有以深探  
其情而逆為之處乎蓋人莫不重死惟有以致其勇則  
惰者奮驕者聳而死有所不敢避嗚呼此正鼓舞天下

之至術也致之如何曰將帥之情與士卒之情異而所以致之之術亦不可得而同何則致將帥之勇在于均任而投其所忌貴爵而激其所慕致士卒之勇在于寡使而紓其不平速賞而卹其已亡臣請得而備陳之今之天下其弊在于儒臣不知兵而武臣有以要其上故閫外之事朝廷所知者勝與負而已所謂當進而退可攻而守者則朝廷有不及知也彼其意蓋曰平時清要儒臣任之一旦擾攘而使我履矢石吾且幸富貴矣豈

不能逡巡自愛而留敵以固位乎向者淮上之師有遷延而避敵者是其事也臣今欲乞朝廷於文臣中擇其廉重通敏者每軍置叅謀一員使之得以陪計議觀形勢而不相統攝非如唐所謂監軍之比彼為將者心有所忌而文臣亦因之識行陣諳戰守緩急均可以備邊城之寄將帥有可進而攻之便彼知搢紳之士亦識兵家利害必不敢依違養敵以自封而遺國家之患此之謂均任而投其所忌凡人之情未得志則冒死亡以求

富貴已得志則保富貴而重其生古人論御將者以才之大小為辨謂御大才者如養驥驥御小才者如養鷹犬然今之將帥豈皆其才大者要之飽則飛去亦有如鷹者焉向者虹縣海道之帥有得一邑破數艦而遽以節鉞使相與之者是其事也臣欲乞朝廷靳重爵命齊量其功等第而與之非謂無予之謂徐以予之且欲使之常疊疊然有歆慕未足之意以要其後效而戒論文吏非有節制相臨者必以資級為禮與左遷人均毋使



如正使遙郡者間有趨伏堂下之辱如唐以金紫而執  
役之類彼被介冑者知一爵一命之可重而朝廷無左  
右選貴賤之別則亦矜持奮勵盡心于朝廷而希尊榮  
之寵此之謂貴爵而激其所慕營幕之間飽煖有不充  
而主將歌舞無休時鋒鏑之下肝腦不敢保而主將雍  
容于帳中此亦危且勩矣而平時又不與之休息以養  
其力至使之舁土運甓以營私室而肆鞭撻彼之心懷  
憤挾怨惟恐天下之無事以求所謂快意肆志者而邀

其上誰肯挺身効命以求勝敵哉兵法曰視卒如愛子故古之賢將有與士卒取下同衣食而分勞苦臣今欲乞朝廷明勅將帥自教閱外非脩營治柵名公家事者不得私有役使以收士卒之心此之謂寡使而紓其不平人莫不惡死亦莫不有父母妻孥之愛冒萬死幸一生所謂奇功折獲者有一資半級之望朝廷較其毫釐而裁抑之賞定而付之於軍則胥吏軋之主將邀之不得利不與敵去師捷主將享大富貴而士卒有一命

又復沮格如此不幸而死妻離子散香火蕭然萬事瓦  
解未死者見之誰不生心兵法曰軍賞不踰時而古之  
賢將蓋有為士卒裹瘡卹孤者臣今欲乞朝廷遇有賞  
命特與差官攜至軍中呼名給付而死事之家申勅主  
將曲加撫勞以結士卒之驩此之謂速賞而卹其已亡  
如此則驕者化而為銳惰者化而為力有不守矣守之  
而無不固有不攻矣攻之而無不克凡茲數事非有難  
行重費朝廷何惜而不舉以收將卒它日之用哉臣竊

觀陛下向嘗訓百官以寵武臣隆恩數以優戰伐是誠有意于激勵將卒矣然其間尚有行之而未及詳已行而旋復弛之事欲望陛下察臣所以得於行伍之說如此而明付之宰相使之審處而力行之庶幾有以得上下之驩心而急難不至于誤國此實天下之至計也其防微曰古之為國者其慮敵深其防患密故常不吝爵賞以籠絡天下智勇辯力之士不欲一夫有憂愁怨懟無聊不平之心以敗吾事蓋人之有智勇辯力者是皆

天民之秀傑者類不肯自己苟大而不得見用於世小而又飢寒于其身則其求逞之志果於毀名敗節凡可以紓忿充欲者無所不至矣是以敵國相持勝負未決一夫不平輸情于敵則吾之所忌彼知而投之吾之所長彼習而用之投吾所忌用吾所長是殆益敵資而遺敵勝耳不可以不察傳曰謹備于其外患生于其內此正聖人所以深致意而庸人以為不足慮也昔者楚公子巫臣嘗教吳乘車射御而吳得以逞漢中行說嘗教

單于毋愛漢物而漢有匈奴之憂史傳所載此類甚多  
臣之為今日慮者非以匹夫去就可以為朝廷重輕蓋  
以為泄吾之機足以增敵人之頡頏耳何則科舉不足  
以盡籠天下之士而爵賞亦不足以盡縻歸附之人與  
夫逋寇窮民之無所歸始冤報恨之無所泄者天下亦  
不能盡無竊計其中亦有傑然自異而不徇小節者矣  
彼將甘心俛首守死于吾土地乎抑亦壞垣越柵而求  
釋于他域乎是未可知也臣之為是說者非欲以聳陛

下之聽而行已之言蓋亦有見焉耳請試言其大者金  
亮之南下也海道舟楫則平江之匠實為之淮南惟秋  
之防而盛夏來伐則無錫之士實甚之剋敵弓弩敵兵  
所不支今已為之殿司之兵比他卒為驕今已知之此  
數者豈小事哉如聞皆其北歸之人叛軍之長教之使  
然且歸正軍民或激于忠義或迫于虐政故相扳來歸  
其心誠有所慕也前此陛下嘗許以不遣矣自去年以  
來敵人間以文牒請索朝廷亦時有曲從其間有知詩

書識義分者如斛元振輩上章請畱陛下既已旌賞之矣若俗所謂泗州王等輩既行之後得之道路皆言陰通偽地教其親戚訴諸敵人移牒來請此必其心有所不樂於朝廷者若此曹雖闕冗無能累千百數舉發以歸之固不足卹然人之度量相越智愚不同或其中亦有所謂傑然自異者患生所忽漸不可長臣願陛下廣含弘之量開言事之路許之陳說利害官其可採以收拾江南之士明詔有司時散俸廩以優卹歸朝歸正之



人外而勅州縣吏使之蠲除苛斂平亭獄訟以紓其逃  
死蓄憤無所伸愬之心其歸正軍民或有再索而猶言  
願行者此必陰通僞地情不可測朝廷既無負于此輩  
而猶反覆若是陛下赫然誅其一二亦可以絕其姦望  
不然則縱之而不加制玩之而不加卹恐他日萬一有  
如先朝張源吳昊之西奔近日施宜生之北走或能馴  
致邊陲意外之擾不可不加意焉臣聞之魯公父文伯  
死有婦人自殺于房者二人其母聞之不哭曰孔子賢

人也遂于魯而是不隨今死而婦人為自殺是必於其長者薄於其婦人厚議者曰從母之言則是為賢母從妻之言則不免為妬妻今臣之論歸正歸朝軍民誠恐不悅臣之說者以臣為妬妻也惟陛下深察之其久任曰臣聞天下無難能不可為之事而有能為必可成之人人誠能也任之不專則不可以有成故孟子曰五穀種之美者也苟為不熟不如稊稗何則事有操縱自我而謀之已審則一舉而可以遂成事有服叛在人而

謀之雖審亦必持久而後可就蓋自古遐裔為中國患  
彼皆有爭勝之心聖人方調兵以正天誅任宰相以責  
成功非如政刑禮樂發之自己收之亦自己之易也朝  
而用兵夕而遂勝公卿大夫交口歸之曰此宰相之賢  
也明日而臨敵後日而聞不利則羣起而媒孽之曰宰  
相不足與折衝也乍賢乍佞其說不一於是人君亦不  
能自信欲求之立事難矣哉臣讀史嘗竊深嘉越勾踐  
漢高祖之能任人而種蠡良平之能處事驟而勝遽而

敗皆不足以動其心而信之專期之成皆如其所料也  
觀夫會稽之栖五年而吳伐齊虛可乘也種蠡如不聞  
又四年吳伐齊虛可乘也種蠡反發兵助之又二年吳  
伐齊不勝而種蠡始襲破之可以取之種蠡不取又九  
年而始一舉滅之蓋歷二十又三年而勾踐未嘗以為  
遲而奪其權豐沛之興秦二年漢敗于薛漢元年高帝  
厄于鴻門又二年弔于彭城又三年困于滎陽又五年  
不利于夏南良平何嘗一日不從之計議然未免于齟

齧者蓋歷五年而始蹶項立劉高帝亦未嘗以為踈而奪其權誠以一勝一敗兵家常勢懲敗徂勝非策之上故古之人君其信任大臣也不間於讒說其圖維大功也不卹于小節所以能責難能不可為之事於能為必可成之人而收其效也敵人為朝廷患如病疽焉病根不去終不可以為身安然其決之也必加炷刃則痛亟而無後悔而其銷之也止於傳餌則痛遲而終為大患病而用醫不一其言至炷刃方施而傳餌移之傳餌未

幾而炷刃奪之病不已而乃咎醫吁亦自惑也且禦敵  
有二道惟和與戰和固非長策然太上皇帝用秦檜一  
十九年而無異論者太上皇帝信之之篤而秦檜守之  
之堅也今日之事以和為可以安而臣不敢必其盟之  
可保以戰為不可講而臣亦不敢必其兵之可休惟陛  
下推至誠踈讒慝以天下之事盡付之宰相使得優游  
無疑以悉力于圖維則可和與戰之機宰相其任之矣  
唐人視相府如傳舍其所成者果何事准蔡之功裴度

用而李師道遣刺客以緩師高霞寓敗而錢徽蕭俛以  
為言憲宗信之深任之篤令狐楚之罷為中舍李逢吉  
之出為節度皆以沮謀而見疎故君以斷臣以忠而能  
成中興之功而頃者張浚雖未有大捷亦未至大敗符  
離一挫召還揆路遂以罪去恐非越勾踐漢高帝唐憲  
宗所以任宰相之道非特此也內而戶部出納之源外  
而泉漕總司之計與夫邊郡守臣屯戍守將皆非朝夕  
可以責其成功者臣願陛下要成功于宰相而使宰相

責成功于計臣守將俾其各得專於職治而以祿秩旌其勞績不必輕移遽遷則人無苟且之心樂于奮激以自見其才一網既舉衆目自張天下之事猶有不辦者臣不敢信其然也其詳戰曰臣聞鳩梟不鳴要非祥禽豺狼不噬要非仁獸此敵人雖未動而臣固將以論戰何則我無爾詐爾無我虞然後兩國可恃以定盟而生靈可恃以弭兵今彼嘗有詐我之情而我亦有虞彼之備一詐一虞謂天下不至於戰者惑也明知天下之必



戰則出兵以攻人與坐而待人之攻也孰為利戰人之  
地與退而自戰其地者孰為得均之不免於戰莫若先  
出兵以戰人之地此固天下之至權兵家之上策而微  
臣之所以敢妄論也詳戰之說奈何詳其所戰之地也  
兵法有九地皆因地而為之勢不詳其地不知其勢者  
謂之浪戰故地有險易有重輕先其易者險有所不攻  
破其重者輕有所不取今日中原之地其形易其勢重  
者果安在哉曰山東是也不得山東則河北不可取不

得河北則中原不可復此定勢非臆說也古人謂用兵如常山之蛇擊其首則尾應擊其尾則首應擊其身則首尾俱應臣竊笑之夫擊其尾則首應擊其身則首尾俱應固也若夫擊其首則死矣尾雖應其庸有濟乎方今山東者敵人之首而京洛關陝則其身其尾也由泰山而北不千二百里而至燕燕者敵人之巢穴也自河失故道河朔無濁流之阻所謂千二百里者從枕席上過師也山東之民勁勇而喜亂敵人有事常先窮山東

之民天下有變而山東亦常首天下之禍至其所謂備  
邊之兵較之他處山東號為簡略且其地於燕為近而  
其民素喜亂彼方窮其民簡其備豈真識天下之勢也  
哉今夫二人相搏痛其心則手足無強力兩陣相持謀  
其營則士卒無鬪心故臣以謂兵出沔陽則山東可指  
日而下山東已下則河朔必望風而震河朔已震則燕  
山者臣將使之塞南門而守請試言其說敵人列屯置  
戍自淮陽以西至於沔隴雜女真渤海契丹之兵不滿

十萬關中洛陽京師三處彼以為形勢最重之地防之為甚深備之為甚密可因其為重大為之名以信之揚兵於川蜀則曰關隴秦漢故都百二之險吾不可以不爭揚兵於襄陽則曰洛陽吾祖宗陵寢之舊廢祀久矣吾不可以不取揚兵於淮西則曰京師吾宗廟社稷基本於此吾不可以不復多為旌旗金鼓之形陽為志在必取之勢已震關中又駭洛陽已駭洛陽又聲京師彼見吾形忌吾勢必以十萬之兵而聚三地且沿邊郡縣

亦必皆守而後可是謂無所不備則無所不寡如此則  
燕山之衛兵山東之戶民中原之簽軍精甲銳兵必悉  
舉以至吾乃以形聳之使不得遽去以勢畱之使不得  
遂休則山東之地固虛邑也山東雖虛竊計青密沂海  
之兵猶有數千我以沿海戰艦馳突於登萊沂密淄濰  
之境彼數千兵者盡分於屯守矣山東誠虛盜賊必起  
吾誘羣盜之兵使之潰裂四出而陛下徐擇一驍將以  
兵五萬步騎相半鼓行而前不三日而至兗鄆之郊臣

不知山東諸郡將誰為王師敵哉山東已定則休士秣馬號召忠義教以戰守然後傳檄河朔諸郡徐以兵躡其後此乃韓信所以破趙而舉燕也天下之人知王師恢復之意堅敵人破滅之形著則契丹諸國如鄂韓哲伯之事必有相軋而起者此臣所以使燕山塞南門而守也彼敵人三路備邊之兵將北歸以自衛耶吾已制其歸路彼又虞淮西襄陽川蜀之兵未可釋而去也抑為戰與守耶腹心已潰人自解體吾又將突出其背而

夾擊之當此之時陛下築城而降其兵亦可驅而之北  
反用其鋒亦可縱之使歸不虞而後擊之亦可臣知天  
下不足定也然海道與三路之兵將不必皆勇士不必  
皆銳蓋臣將以海道三路之兵為正而以山東為奇奇  
者以強正者以弱弱者牽制之師而強者必取之兵也  
古之用兵者唐太宗其知此矣嘗曰吾觀行陣形勢每  
戰必使弱常遇強強常遇弱敵遇吾弱追奔不過數十  
百步吾擊敵弱常突出自背反攻之以是必勝然此特

太宗用之於一陣間耳臣以為天下之勢避實擊虛不  
過如是苟曰不然必將驅堅悉銳由三路以進寸據尺  
取為恢復之謀則吾兵為敵弱久矣驟而用之未嘗不  
敗近日符離之戰是也假設陛下下一舉而取京洛再舉  
而復關陝彼將南絕大河下燕薊之甲東逾泗水漕山  
東之粟陛下之將帥誰與守此曩者三京之役是也借  
能守之則河北猶未病河北未病則雌雄猶未決也以  
是策之陛下其知之矣昔韓信請於高祖願以三萬人



北舉燕趙東擊齊南絕楚之糧道而西會於滎陽耿弇  
言於光武欲先定漁陽取涿郡還收富平而東下齊皆  
越人之都而謀人之國二子不以為難能而高祖光武  
不以為可疑卒藉之以取天下者見之明而策之熟也  
由今觀之使高祖光武不信其言則二子未免為狂何  
者其言落落而難合也如臣之論焉知不有謂臣為狂  
者乎雖然臣又有一說焉為陛下終言之臣前所謂兵  
出山東則山東之民必叛敵以為我應是不戰而可定

也議者必曰辛巳之歲山東之變亦大矣然終無一人  
為朝廷守尺寸土以基中興者何也臣之說曰北方郡  
縣可使為兵者皆鋤犁之民可使以用此兵而成事者  
非軍府之黥卒則縣邑之弓兵也何則鋤犁之民寡謀  
而易聚懼敗而輕敵使之堅戰而持久則敗矣若夫黥  
卒之與弓兵彼皆居行伍走官府皆知其指呼號令之  
不可犯而為之長者更戰守其部曲亦稔熟其賞罰進  
退之權建炎之初如孔彥舟李成輩殺長吏驅良民膠

固而不散者皆此輩也然辛巳之歲何以不變曰東北之俗尚氣而耻下人當是時耿京王友直輩奮臂隴畝已先之而起彼不肯俛首聽命以為農夫下故寧嬰城而守以須王師而自為功也臣嘗揣量此曹間有豪傑可與立事者然敵人薄之而不以戰自非土木之興築官吏之呵衛皆不復用彼其思一旦之變以逞夫平昔悒悒勇悍之氣抑甚於鋤犁之民然而計深慮遠非見王師則未肯輕發陛下誠以兵入其境彼將開門迎降

惟恐後耳得民而可以使之將得城而可以使之守非  
於此焉擇之未見其可也故臣於詳戰之末而備論之  
左宣義郎祕書省校書郎兼國史院編修官員興宗上  
書曰臣聞聖人感人心而天下和平蓋人心不感則離  
離則天下之和不平者將應之矣人心之感不感聖  
人初不間乎内外也以信示人無人不信以惠懷人無  
人不懷使天下畢信畢懷是之謂德感也恭惟祖宗建  
置社稷餘二百年永永傳不替之象獨非有以德感人

者乎此不可不稽也臣愚不佞待罪三館鄉者丙戌之秋嘗入建請北方歸正之士捨氈裘襲冠帶本非前日一都督府力能誘而來之者誠以吾宋有大義中國有至仁北方將士樂歸陛下之德只也陛下感之亦極矣願幸加意以禮始終之是時國家未萌還俘囚之議而臣之預言如此陛下過聽不以下臣迂愚其後繼用王友直於江上將王宏於步軍其餘才武以次錄用此聖主至斷至明者也中外率以為是今者敵因盜賊之萌

乃起俘囚之請茲事體大應酬若失便闕安危臣日夜  
念此至熟也陛下若曲徇外庭之言不計利鈍不愛歸  
附姑曰還其十百以緩目前之患臣恐患自此滋矣且  
王言如日外庭乃欲蝕之使朝廷前日為義今日為不  
義前日示仁今日為不仁虧敗德意莫甚於此又況俘  
囚一搖懼者必衆十可以聚百百可以合千風塵飛揚  
肘腋為變甚可畏也其性純良者自此生心其慕教化  
者自此絕望懷反側者自此有詞心剽賊者自此鄉導

陛下異時有事北方沿淮以北陛下縱欲募用其人不識誰肯為陛下用乎此臣所以痛心疾首也今欲外圖帖息之計內寬流附之心陛下曷不試臣令畫三策於前顧臣之策必不為北敵餌為中國羞也用其一則可以破不直之請用其二則可以塞無已之求用其三則可以成久禦之利唯上所命也謂宜今日因往來之使或對境之便遺之以書曰近聞侍旺懷異而楚州不知州之罪也本朝居數千里外其及知之乎此因大國有

言然後覺之其楚州官吏並已竄謫沿邊軍民並已戒約則本朝凡嚴大國之意可謂曲折矣且侍旺自分必死故支離其詞奈何大國聽之萬一本朝獲一姦盜妄分析黨與入北界者本朝亦聽之乎如是則不直之請可破矣此臣策之一也又遺之言曰甲申之歲大國議和唐鄧海泗荆淮重地也輒舉以遺大國口血未乾繼有兩淮之役俘取吾民凡數十萬本朝兼愛南北之赤子惠顧前盟不敢求也今俘囚百十奔迸四出死生莫



知大國累歲求之獨何意歟觀此似欲搖動和議曲不  
在本朝天地鬼神實臨之如是則無已之求可漸塞矣  
此臣策之二也傳曰善用兵者無赫赫之功豈獨用兵  
處事亦然也臣竊笑前者王琪等經理淮上引見而對  
朝辭而出道路莫不指目布置張皇竟以泄露諸將所  
以備敵者近乎虛聲而敵所以疑我者積乎實禍臣未  
聞事機不密而可用鷙鳥不伏而能擊者也是乃敵所  
以數啓紛紜之談歟今皆見之矣臣謂今日之事當卑

其禮而長其怠賒其日以寬其詞悠悠以靜處之縱不見信必無大侵然後潛正師律默課農桑陰蓄器械使事興而衆不知敵如我何則久禦之利漸成矣此臣策之三也彼敵自辛巳及今迭戰迭敗豈真健者哉謂秦無人故直欲以威劫之耳如不出臣三策則正墮敵計悔無及也或謂臣之三策當矣陛下必審處之矣陛下智勇能遠圖天威能亟決然尚有可慮者太上之意主於和柔故陛下一切委順今者欲出詞拒敵恐不遑也

萬一生事如太上何如大孝何臣愚以此正陛下所以  
事太上而稱大孝者也大孝以安社稷為悅使一旦歸  
附動搖流人怨憤憂獨不在社稷之間乎昔唐肅宗起  
師靈武猶不欲以賊遺君父當時以孝與之況陛下至  
孝萬萬肅宗者乎雖然敵勢實不可保陛下奈何不早  
為之策哉漢七國削亦反不削亦反晉蘇峻召亦反不  
召亦反今臣度敵之勢和亦變不和亦變特其變有早  
晚爾而說者謂徑與俘囚則絕今可以免禍是猶抱虎

而寢指虎之終不噬已也烏呼亦愚矣曷若整器械  
求所以禦虎者今迺欲專用抱虎之術哉內外歸附亦  
必用此潛窺陛下以為榮辱死生之決也措置一失禍  
猶發機從此殆矣而可無思乎陛下若賜清閒之燕得  
熟數于玉陛願首試臣三策以次畢用之若衆不附敵  
不怯榮名不成則是臣飾說欺君者也臣請死

祕書省正字趙汝愚論恢復奏曰臣竊惟陛下仰承太  
上付託之重于此九年矣凡祖宗之疆土未復兩世之

雖耻未報實惟陛下之責未已。是宜陛下朝不遑食夜不遑寐。日積月累。勤求所以為天下之道。如拯溺救焚。而不敢緩也。雖然。急趨無善迹。促柱無和聲。又烏可不量事勢。苟為一切之計。惟速之是務哉。臣嘗竊聞或者之言。謂陛下銳於圖事。惟患兵籍之不多。養兵既多。始憂財用之不給。內外虛耗。軍士怨嗟。於是苟有道可以豐財。則利害未暇究也。苟得人出以任事。則能否未暇擇也。兩淮城壘。土脉膏潤。而不暇待也。沿江保甲。徒擾

無用而不暇恤也凡此數者亦由陛下不忘祖宗創業之勤而求之太速耳行之不已臣恐陛下求之愈速而其效愈遲也經曰必有忍其乃有濟又曰小不忍則亂大謀今夫陛下之所為謀者豈細事哉臣愚伏望陛下廣恢廓之度建宏遠之規不以小利動其心不以速成敗厥事求賢為上立政次之事之可為者屢省而後為弊之可去者以漸而後去人事修而天時至區區敵人有不足殄滅者矣

汝愚乞撫安歸正人疏曰臣伏思天下之弊多矣然其  
大且逼者莫若歸正人彼皆祖宗涵養之餘不勝敵人  
之暴一旦來歸如脫寇盜而得慈母其所望者深矣朝  
廷既不能盡滿其意而民間時時訛言咸謂敵人來有  
所索轉相驚動懷不自安夫以羈旅不自存之人而懷  
反側不自安之意豈得不深為之慮也為今日計要先  
求術以安之人情既安雖有姦宄不能動搖矣臣請試  
言所以安之之術其一換授官資之人並注添差差遣

至易得也書鋪以其不知吏部格法百計邀阻所須貨賂數倍常人至有數月不得調者欲望聖慈令吏部措置明立勝約諸歸正人並以到鋪之日為始後兩月不授差遣許至吏部陳訴犯者重置憲典仍詔州縣其合得俸給並須按月支破有積壓不支至一季以上者令監司劾奏其二北方豪傑之士捐親戚棄墳墓間關而來有闔門受戮而不顧者其志豈存升斗之利哉而所  
在例以饑荒待之無以自達鬱鬱叛去者亦多矣欲望



明詔諸軍管軍統制及緣邊監司守臣依隆興元年薦  
舉武臣格式有謀略沈雄可任大計寬猛適宜可使御  
衆臨陣驍勇可鼓士氣威信有聞可守邊郡者不以有  
無文武官資各薦一二人人以半歲為限陛下親賜試  
問擇可用者隨才用之雖拔十得五未足以盡其人而  
雍齒且侯其黨亦粗慰矣其三散在諸軍為兵者人給  
錢絹不多飢寒切體進退無路情實可矜或者將校非  
人一切指為北人勞逸異任種種不同遂令忠義之心

積成愁怨之氣國家財賦少積縱未能均有所濟猶宜  
遴選將帥能與士卒同甘苦者俾勤而撫之尚庶幾其  
可也凡此三者臣日夜念之方時無虞隱伏未見小有  
風飈之警懼非法令之所能制也惟陛下畱神幸甚

汝愚又上自治之策曰臣踈賤無取誤蒙陛下恩私選  
自諸生擢登禁路非惟身荷寵祿且將澤及子孫致命  
捐軀誓難圖報又念國家靖康之難同姓一時俱北行  
者蓋數千人然則家國之事臣實義同休戚今身雖在

遠苟可以效涓塵之益者誠不當畏避蓄縮以疏遠自疑也惟陛下畱神幸甚臣伏自去歲夏中傳聞金人還歸本土緣臣僻居海角無從詢問敵中事體臣仰惟陛下英明獨運威略如神多士盈庭筭無遺策使臣空竭肺腑何補毫芒但以世受國恩不無私憂過計竊謂敵情難測未可輕言迹其盜據幽燕比年似亦安靜今乃無故妄動其間必有深謀或者謂其嫡庶不分兄弟爭立敵君牽制不斷將分國而王之昔趙武靈王既立少

子而復愛長子欲兩王之猶豫未決而身及於難漢五  
單于爭立而其國遂衰設如或者之言在彼誠為失策  
然臣竊聞敵君既老而常有敬慕太上皇帝之心故築  
宮以仁壽為名久欲為傳授之事使其復愛長子欲裂  
土而封之亦惟下一紙之令則其事即日可定矣何至  
捨其已成之業而犯衆情之所難棄中原之輿區而退  
伏於絕漠苦寒之地彼又豈不知陛下卧薪嘗膽志在  
規恢胡為遠自遁藏深形退屈兵法有進無退義豈其

然臣謂朝廷正當深察其情而思所以待之之策未可  
直謂其施為悖謬而遂有輕視強敵之心也臣輒不量  
淺陋伏而思之而得三說其一臣昨在吏部時聞敵人  
之長子號許王者強暴不仁專好武事志在傾奪將為  
亂階臣始聞之常竊私喜其間亦有謂不然者今臣之  
所治雖在南方而官吏之中多北來人士其間亦有久  
在淮南而熟知淮北事體者皆言其人強忍堅志素蓄  
姦謀接納雄豪收採時譽常至沿淮措置邊事皆乘驛

騎奔馳馳去倏來人不知其為敵君之子也且謂其人  
不死必能大為邊患使敵人善自為計委之南據汴都  
授以偏師用為藩屏則國家將倍勞戍守邊境未易得  
安而敵君在燕以重勢臨之彼亦安能篡奪今若陰使  
其父歸伏舊巢察其姦心用志非小其人蓋將挾君父  
之勢間兄弟之情乘北方士馬之強為併吞其國之舉  
發遲禍大可為深憂其二敵人自得國以來蓋常以北  
方為根本如漢高祖與項籍轉戰滎陽京索間而以關

中為根本安祿山雖盜據洛陽而以范陽為根本之類是也竊料敵人三世篡奪不能不過為隄備今將立其少子而恐或者議其後也故以其身退居根本之地而壓之以重勢俟其少定徐議後圖然則一時之計雖若煩勞恐其因事制宜亦未為深失也臣又聞方金亮時剪滅宗室完顏氏多死者獨今敵君佯為有疾退居遠郡若無能為一旦乘海陵之動取其國如探囊運其即位許時亦絕不生邊事臣觀其人似亦非輕舉妄動者

蓋恐其間必自有說也其三或者疑其曩時篡弒皆在  
已年今茲北遷將為厭勝然自敵人得國今已二十餘  
年蓋嘗歷癸巳之歲矣未聞有厭勝之事何也大抵人  
之常情安土重遷吉凶悔吝皆生乎動誠使敵人無故  
妄動別無他謀而違逆衆情勞役百姓中原父老固已  
不堪其擾矣又聞其隨行奴婢甚有逋逃去歲苦寒人  
畜多死如是不已孰不怨嗟竊恐其間將有豪傑之士  
如晉石勒劉聰之徒乘間俟隙崛起自奮弱則請服強



則自固亦將重煩朝廷經理也臣竊料敵情為是三說  
詳觀事勢朕兆已萌遠不踰三年近或止暮歲事機一  
發利害萬端不審陛下萬機之餘亦嘗深念及此否孟  
子曰國家閒暇及是時明其政刑雖大國必畏之矣臣  
觀自古敵國相對常苦難得閒暇之時惟其預備於無  
事之先故能患至而無恐臣謂朝廷及今閒暇當亟圖  
所以自治之策不宜視同常務使有後時之悔也臣觀  
自古國之治亂兵之強弱全在得人然則搜選人材最

為當今急務練兵理財蓋又次之陛下聖意憂勤盡思  
一旦用兵之際自東徂西凡備敵者幾處為總帥者當  
用幾人將佐中素有威望可以獨當一面者幾人幕府  
賓贊能知兵家事體緩急可以濟務者幾人兵法曰興  
師十萬出征千里百姓之費公家之奉日費千金陛下  
恭儉焦勞內帑所儲者可支幾歲自古兵連禍結亦豈  
可以歲月計哉惟昔辛巳之役上天垂祐金亮喪師甲  
申之役敵人實有厭兵之意故兵纔及境不數月而遂

鮮要不可以是為準也臣觀自古用兵不計勝負惟能持久者終成帝業陛下復料今日之兵將財力事勢能以持久而不困乎若曰祖宗德澤感人甚深中原故老常有謳吟思漢之意一旦北方有變必有簞食壺漿以迎王師者朝廷乘破竹之勢中原遂可傳檄而定矣初不待歲月持久也臣仰惟陛下自即尊位于今二十餘年盛德美意日新一日是宜上符天道下順人情克復之期不俟再舉然臣猶謂取諸已者可信而責於人者

難期正須朝廷國勢安強然後豪傑可收為用若昔晉宋之際蓋無日不望中原豪傑之助也然計其功效終成畫餅故臣惟願陛下勤於自治而已兵法又曰知己知彼百戰百勝又曰三軍之事莫親於間賞莫厚於間事莫密於間又曰愛爵祿百金不知敵之情者不仁之至也非人之將也今敵君北徙國人既知之矣然其所以北徙之意朝廷猶未能深得其情是則諸將用間不密之過臣聞昔楊存中在紹興諸將中最為不及然其

設心措意猶是向公如李顯忠輩方得罪秦檜棄置閒廢之中存中為之傾貲結納故能卒收其用臣聞存中每遣間諜輒委之數萬緡恣其所往皆數年而後歸故能深得敵人之情狀今之諸將孰可任此臣愚伏望陛下內則親詔大臣選羣材以脩政事外則密諭將帥厚遣間以覘敵情至於近邊移戍修城凡動人耳目之事皆可少緩而弗為敵人所欲歲幣亦宜如數遣發不必與之深較嚴戒邊吏毋得輕輒生事俾其安意肆志不



復以我為疑然後養威蓄銳而徐觀其變則庶幾其可圖矣臣僭越狂妄冒瀆天威不任皇懼待罪之至

戶部侍郎汪應辰論國用士風軍政疏曰臣仰惟陛下初即大位羣臣百姓拭目傾耳以觀化聽令其精微遠大雖非見聞可及而動容周旋一以禮法仁孝之行恭儉之德惻怛愛民之心謙虛盡下之誠類皆出於聖性之自然者以至收召名士博求直言追錄忠烈莫不犁然當於人心中外稱誦以為此聖主也一見決矣孔子

曰三代之王也必先其令聞詩曰明明天子令聞不已  
夫豈有意於求名哉蓋昔之有事于四方若卜筮罔不  
是孚者以其民悅服之有素也誠因始初清明之政中  
外悅服之心推其所已為求其所未至凡人心之所欲  
而今日之所當行者舉而措之以幸天下蓋沛然若決  
江河莫之能禦事半古人而功倍之矣臣請言人心之  
所欲而今日之所當行者惟陛下財擇自用兵以來有  
司於常賦之外所以搜求征取者名色不一蓋十倍於

漢唐與祖宗之時而不翅也州郡為之匱乏百姓為之凋敝宜其財聚於上不可勝用矣而大農常有不足之憂則夫今日之國用不可以不理也平居無事將帥之臣坐享貴富一旦警急聞命則遷延而不前望敵則皇遽而自却事平之後益自誇詡論功第賞動以數萬若其名籍之虛實技勇之高下皆不可得而考核則夫今日之軍政不可以不脩也以便文自營為得計以因循苟且為練事希功者肆意於誕謾而不疑逐利者甘心



於奪攘而不耻朝廷所託材器職業者萃於羣下也而積習如此將何望焉則夫今日之士風不可以不變也以陛下之仁聖而因始初清明之政中外悅服之心慨然欲大有為於天下以此三者為當務之急酌之衆論參以時變先甲三日而究其所以然後甲三日而慮其將然是非之理本末之序既已參於前矣言之則必可行行之則必可久任使賢能必盡其人之材賞罰功罪必當其事之實騁浮辭者不得以亂真挾私意者不得

以害正斷之以不惑持之以不倦未有不還至而有效者也國用理則民可裕矣軍政脩則兵可強矣士風變則政事可舉矣內以治吾之國家外以制敵豈不綽綽然有餘裕哉昔漢之文景躬行節儉則有家給人足之效宣帝綜覈名實則有吏稱職民安業之效夫以居得致之位操可致之勢而又有能致之資其於天下之事特患有所不為爾竊惟太上皇帝以天下之大付之陛下夫豈苟然而已哉蓋以天下與人易為天下得人難

太上皇帝既得其所難矣陛下當思所以任其難者詩  
曰我日斯邁而月斯征夙興夜寐毋忝爾所生時不可  
失也微臣不勝拳拳之至

直煥章閣王師愈上奏曰臣聞天位於上雷動於下其  
卦曰无妄以四時言之春夏之發生雷雖震驚人不以  
為妄所當然也故能成育物之功秋冬之斂藏雷雖隱  
然而有聲人莫不惕然而駭聽蓋其動也妄必有札瘥  
癘疫之患聖人體天以立極法天而圖治安平之時出

人起居罔有不欽發號施令罔有不臧非以其材略智術足以高天下亦以其動靜本於天理之自然不撓乎人為之私也是以濟大業者當艱難之時或速而有成或緩而有成究其所以然皆无妄也漢高之王漢中未幾而長驅於滎陽京索間不五載而成帝業蓋因思東歸之士其動不可以緩也諸葛亮之相蜀國事未定則閉關息民以圖之其動不可以速也臣又聞善圖治者如良醫之療疾固有指日而致效者亦有累月而致效

者氣血未衰偶為外邪所乘或汗或下其效立見此豈待累月之久哉若夫沈痾之餘羸然蕭然必在乎固其本元養其精神強其筋力反欲投瞑眩之劑求指日之效又欲娛之以華麗宴樂之奉其可哉方今天下之患胎於熙豐結於崇觀潰裂於靖康爰自紹興之初上下相維持將復振矣未幾用事之臣又從而弱之幸賴天啓聖明陛下嗣膺大統規恢十年始有蘇息安強之兆實社稷生民之福也伏願陛下遠稽義經之无妄俯察

良醫之治病脩我之備待彼之釁毋欲速而輕動其不能成萬全之勲者臣未之信也

師愈為長沙守上奏曰臣聞濟大業者不可畏敵人之盛強亦不可喜敵人之失德畏其盛強則心必怠喜其失德則心必驕驕與怠一萌於胷中而能圖維者鮮矣三代而下遇強敵者莫如漢高祖方項羽席戰勝之威以入關分王諸侯可謂強矣高祖則未嘗畏焉羽之慄悍猾賊所過殘滅可謂失德矣高祖則未嘗喜焉竟趨


漢中務寬仁以收民心擴大度以用人傑終能遂其欲  
東之志五載而成帝業其規模為何如靖康之變亘古  
所無之耻不共戴天之讎將五十年矣在當時見聞其  
事者壯者已老者已死今之年三四十者雖語以當  
時之事已茫然矣此讎此耻殆將忘之祖宗在天之靈  
四海忠義之心所望雪此耻復此讎有待於陛下陛下  
亦以雪耻復讎為已任即位以來宵旰焦勞未嘗不在  
是也然以強弱之勢論之敵人土地之衆金穀之富車

馬之壯雖元魏所不逮自古遐裔之盛未之有也世之  
畏縮守和議者必持是說焉曾不知強弱盛衰相為消  
長未有強而不弱盛而不衰者厥今敵勢安知天意不  
已厭其德而將罰之乎故其強易弱其盛易衰況加以  
嚴威中原之民怨入骨髓以是觀之其可畏乎世之輕  
狂妄議進取者往往又喜是說謂可以指日恢復曾不  
思國家素備果何如哉己巳之歲金亮篡奪辛巳之歲  
金亮自敗天授機會如此國家不能進跬步取尺寸土



良由無素備也何謂素備一曰脩己任德以承天意二曰實惠及民以固邦本三曰廣收英傑以為股肱四曰據要害之地以壯形勢五曰練兵足用以待進取此五者人皆能言之陛下亦飽聞而厭聽人多以為腐儒常談殊不知五穀無異味而能療飢布帛無異采而能禦寒五者雖若常談實圖維之先務要在深思而力行既有素備機會之來斯能乘之何謂機會或骨肉爭國或種落離叛或姦雄割據或大盜蜂起或輕動深入皆機

會也魏相曰兵應者勝素備已脩或逢機會以應兵乘之而不能成商宗周宣漢光武之業者未之聞也苟為不此之務徒能張虛氣出大言忘遠慮爭小利而曰能圖恢復者非臣所知也



歷代名臣奏議卷九十四